

大清銀行始末記

第一章 大清銀行之起原及名稱之變更

第一節 起原

清德宗光緒三十年春正月戶部奏請由部試辦銀行以爲推行幣制之樞紐詔可之是年三月奏定試辦銀行章程三十二條三十四年正月度支部奏定大清銀行則例二十四條而銀行監督張允言復準此則例擬定現行詳細章程四十條由股東會議決旋於宣統元年七月十三日經度支部覈准施行試辦章程因是遂廢此大清銀行起源之大略也茲將屢次摺奏劉文章程則例節錄於左

(一) 戶部試辦銀行摺奏

(上略) 此次鑄造銀幣宗旨在整齊幣制廣爲推行收回向用生銀漸次改鑄以及行用紙幣鑄造金磅此中轉運關鍵自以部庫之出納爲本源而尤須設有銀行爲之操縱維持始能暢行無阻中國向無銀行各省富商所設票號錢莊大致雖與銀行相類特公家未設有銀行相與維繫則國用盈虛之大局不足資以輔助凡此情形皆早在聖明洞鑒之中前據粵紳候補四品京堂張煜南等請招集南洋華商股份在京城設立商辦銀號並請由部撥給股本銀兩已由臣等奏明准予立案惟該紳現赴南洋招股開辦尙屬無期現當整齊幣制之際亟賴設有銀行爲推行樞紐臣等再四

籌商現擬先由戶部設立籌集股本採取各國銀行章程斟酌損益迅即試辦銀行以爲財幣流轉總匯之所其詳細章程另由戶部妥擬奏明辦理(下略)

(二)戶部擬訂試辦銀行章程摺奏

(上略)伏查幣制與銀行相輔而行非銀行不能暢行各幣此一定之勢理惟既設銀行則各省皆必有分號必得精明幹練切實可靠之人方能勝任中國素未講求商務非如外國之有財政銀行等學堂預爲儲才之地急切萬難得許多深通此事可靠之人分布各處各國官商銀行名目甚多徧布國中民間稍有積資者無不存放銀行生息商人欲興事業亦取資於銀行人人爭相愛重一經招股應者雲集中國商務初興人尙未知銀行之利股分之是否易招貿易之能否繁盛初辦尙無把握外國發行紙幣爲國家銀行獨得之權誠信素孚故入其國境市中所見無非銀行之紙幣商民信用勝於金銀現幣取其輕賈便易中國官商平素情性隔閡且因從前之鈔票近年之昭信股票辦理不善失信於民更不敢與官交易銀行甫設又勢難遽禁商號出票官中行用紙幣恐一時未能取信商民必須極力設法昭示大信數年以後或可望商情漸通流行無滯銀行之責在於整齊幣制劃定價值既不便於市儉之把持亦有碍於官吏之中飽開辦伊始易致謠喙繁興或懷疑誤會或拂意挾嫌竊恐造言生事輒指爲辦理不善一爲搖惑即難免功廢半途此中委曲爲難

情形均早在聖明洞鑒之中惟有仰懇天恩主持於上俯念茲事體大創辦爲艱屏除一切浮議不爲所搖臣等謹當力任其艱督飭任事之員切實籌畫妥爲辦理斷不能稍事鋪張惟期次第振興徐收成效茲就各國銀行章程採擇其緊要諸端參以中國情形酌擬試辦章程三十二條繕具清單恭呈御覽(下略)

試辦銀行章程

(一) 本行現係試辦擬先備資本銀四百萬兩分爲四萬股每股庫平銀一百兩由戶部籌款認購二萬股其餘二萬股無論官民人等均准購買俟貿易擴充之時再行酌量添招若干股隨時由辦事人等稟請

(二) 本行照有限公司辦法股分以外不再向股東添取銀錢即有虧欠與股東無涉惟添招股分之時則應先儘舊股東如有舊股東不買方可另招新股

(三) 本行現設京師其各大埠如天津上海漢口廣東四川等處酌設分行未設分行之處可與殷實商號訂立合同作爲代辦

(四) 本行專作收存出放款項買賣荒金荒銀匯兌劃撥公私款項折收未滿限期票及代人收存緊要物件其餘未及詳列之款及各項禁令均照各國銀行章程辦理

(五) 本行歸國家保護凡遇市面銀根緊急青黃不接之時本行可向戶部稟請發給庫款接濟其發給之款照章按期籌交息銀

(六) 本行營業年限自開業起以二十年為滿屆期可以稟請展緩限期

(七) 本行每季詳造營業資財切實報告二分送呈財政處戶部查覈財政處戶部並可隨時調閱本行清帳此外各項貿易事業公家均不干預

(八) 以後銀圓局鑄造銀銅各幣均應交本行承領與商號直接往來以便流通市面此項銀銅各幣均按存日多少照章生息繳出

(九) 凡認買股份券者均於開行之前先行繳足四分之一其餘俟本行貿易應用之時再行普告分次收取惟購買此項股份者必須書明姓名籍貫註冊以本國人為斷他國人民不得購買其原有股份者亦不得轉賣與他國之人

(十) 本行分次續收股本之時均於兩月以前普行報告股東若屆期未將續交之款交到者俟其補交時令於應交款目外增納十分之一以懲因循若再經兩月之久仍未交到者即將其股票發賣由其已交本銀內除淨所罰加一之款及因發賣所需一切費如有盈餘交還原主倘或不足仍向原股東追繳其股東遠在外省或外洋者可再展期限兩月照此辦理